

四庫全書

集部

欽定四庫全書

集部

御定歷代賦彙補遺卷六

七

詳校官檢討_臣劉炘

主事銜_臣徐以坤覆勘

總校官編修_臣王燕緒

校對官主事_臣陳文樞

謄錄監生_臣馮省槐

欽定四庫全書

御定歷代賦彙補遺卷六

都邑

晉國賦

有序

明

張鳳翼

余謏陋無能為鄉國重亦不能以文重鄉國客有難晉
國天下莫強焉者一時不能對退而廣子厚晉問為賦
以識之至踏駁挂漏則才識之所不逮也

粵若稽古晉國廣袤麗於黃墟阻三河與碣石實禹貢

之中都輪逶迤其磅礴經曼衍以平鋪遠窳窳而九達
亶天造之雄圖爾其昂畢躔墟參辰應隲漚以楊紆靡
以大陸熱以燭龍掎以鉅鹿北挾沆泝水陸歟吞蒼蚪
左抱白菟右蹲玄武聳轟鶉火迴翻誠風氣之所宅而
扶輿之所庇於是東跨齊疆南連楚畷西距三秦北窮
五國以天門日觀為儲胥以雲夢漢陽為朱闔以紫淵
華嶽為樊籬以黑水青山為障塞控八紘封域以居尊
羌何擬乎彈丸之一幅其山則王屋夏屋龍門雁門三

峻三磴九箕九原纍頭傲斗壺口懸疊砥柱峻嶒而倒
瀉太行截業以蔽瞰又有銅鞮雷首姑射中條蒼莽
嶧崑崙嵒嵒崑崙崑崙崑崙崑崙崑崙崑崙崑崙崑崙
岳之所標其水則沁澮沱汾洮涂泌洑澗滴澇濁漳
涅瀆嘔夷滂潏以敷濤媯汭冲融而厥復疏激灃於龍
渠澹澹澹於象谷又有桑乾獲澤嬰澗平田玉泉金泊
石洞昕川汪洋澎湃連漪潺湲湯湯淼淼渥渥濺濺灌
黃河以東注翕覃懷底績之哽其險則飛狐插漢巨馬

泃峯羊腸九折龍首千尋
飢建井陘之隘苦通句注之
陰其勝則董澤盤盞呂梁噴薄
峪止鳳凰樓高鸛鵲五
髻現境於清涼四鎮宣威於
毳幕其靈則祥開金鳳瑞
應烏龍三峰王氣五日陰夢
雩崇侯兮霖雨駐妒女兮
停風其異則管涔神劒渥洼
天馬朔雪層峨火山紺開
辣蜿蜒以衝水厓踉蹌而負
野其蹟則穀城茆茆鹿茆
芊芊傳巖逆遷孔轍述邇闕
矣西河之室蔚然綿上之
田投筆之臺未圯煉丹之鼎
猶煙此實上游之寰宇既

溥之幅幘也繇是顥烝瀾漫載亭載茁瑰麗以繁瓌奇
以別擅萬物之晶華表千秋之殊絕則有并刀韓甲屈
馬垂環雲沙代赭澤錫遼復廣陽之鐵大鹵之金紛紛
籍籍品品林林若夫冀北之煤連繇大麓斲礪呀巖摩
肩擊轂五方絡繹以躋涂萬竈炘燠而轉煥河東之鹽
漢決神齋皚皚晶晶幕幕鱗鱗佐園泉於九府通賈販
於四鄰又若上黨之塵大河之涘軋札相聞噉喙是比
絢藻火與山龍噉鯨鯨及鯉鯉總興殖於埒區詎瞻瞻

之能齒肆其陂塘瀦灌溉通原隰墾稼穡同名園綈獵
盛圃芬叢蔬則地草天花霜芹雪藕鼈蕨鳧葵晚菰早
韭芋薤蒹葑爰衆爰有行白玉於高門送青絲於纖手
穀則秬秠糜芑粳粳稻秔禾麻荏菽一穗九莖植穉重
穰如坻如京可以實倉箱而穀士女供俎豆以庀粢盛
花則茁芍荼蘼姚黃魏紫芍藥薔薇金嬰玉蕊蓓蕾芳
菲含香散蕊蔽雲塢兮森森簇雕欄兮纍纍木則槐檀
樺栗檜柏椿松桑榆柘櫟杞柳桐楓參天溜雨菱葑菁

蔥滋偃蹇連蜷之勢壯翬飛鳥草之雄果有紫李黃柑
細桃白棣常山之梨安邑之棗馬乳稱猗氏之甘狸首
羨太原之好俱足以敷賁精英而發果蓏之珎他如白
縱冰鼠赤豹黃貌麇茸貉腋龍骨鵬鵠玉芝雲母紫石
黃耆亦莫不猗那是產以蕃動植之奇至於雉堞雲橫
雄關斗絕玉壘金湯困圖端嶮軍州蛇勢以居宇縣夫
牙而列鼎峙受降之城延亘防胡之埒魚符所統什伍
蟬聯戈鋌壓地鼓角應天礧礧碣磳駢駢驥驥象譯寄

鞞之屬靡不震而驚焉聿有朱邱黃扇繽紛匝匝橋駕
飛虹臺邀明月表以晉陽之宮祀以汾陰之闕窮池館
暨巖房攬清冷於不竭且也珠明魏乘壁重秦城臺散
代山之穎圭呈拔樹之靈玉馬璘璠而顯異仙藤菴韻
以旌誠此其著者餘物難名進而求之光岳攸鍾文明
鬱起人傑地靈儷鑣績趾聲施巋巖之顏徽潤簣簞之
泚爾乃摹馳獨往秀擷羣芳行純金錫操凜冰霜既鶴
鳴而鴻漸亦虎變以龍翔越侔儻其魁嶷豈咫尺與尋

常故語高曠則薇留孤竹之風松挂一瓢之月逃三聘
於澠池隱十經於於越傲世兮枕流辭榮兮蔣蘂猶聞
張果還山王喬跨屨俱蟬蛻乎風塵而逍遙於雲壑文
章則賅綜史記玄挾洞林詩詫明河之錦賦稱擲地之
金中說敷陳乎名教橐駝濬發於靈襟蛛網燕泥指空
梁而振響落霞秋水度高閣以流音誰不照丹文而光
綠牒穿月脇以貫天心其為望也忠著程嬰義推張老
智決輔車仁昭結草勒叩岳於相如崇折巾於有道六

龍騰祈數之輝三鳳煥河東之葆殆煜乎垂景耀於春秋而賁然播餘馨於品藻也至若孤憤激大節援誓九死重一言灑龍逢之血遊雉經之魂伏鉏麕之觸甘豫讓之吞溫序銜鬚而抗敵呼延文體以酬恩凡此剛方之氣亦已翻溟海而撼崑崙更有應運風雲爭光鼎呂文揚黼黻之華武奮勛勦之舉若三郤佐軍若五蛇從旅若筴效和戎若筆稱良史若狼暉之突陣摧秦若羊舌之周知教楚咸斌斌乎麟鳳之傳而洸洸乎干城之

侶猶未也六卿既大三晉遂分噓以羸燼蒸以漢雲唐
風之所被宋德之所薰其間師師穆穆濟濟芸芸如信
陵率五國之師平原高十日之飲侯羸收卧內之符毛
遂脫囊中之穎趙奢解閼與之圍陳筮告華陽之警衍
儀前席夫六王頗牧披鋒於四境斯亦畸矣增是雋采
星馳雄飛電掣西京衛霍之軍功東晉裴王之相業狄
梁與薛史同標司馬洎王楊並轍秉燭達旦揭日月於
無疆騎尾歸天壯河山於不蔑繫何代乎無人亦何人

之匪傑又其盛也晉文復國趙武爭盟韓昭修術魏惠
徵兵汾澗胡兒之磊落沙陀亞子之崢嶸當其時屬車
秣馬斬藿披荆叱咤則飄霆改色指揮則參井無精莫
不業業赫赫砰砰轟轟夫非一世之雄哉然猶偏霸耳
蓋嘗覽輿地按冀方厯蒲阪溯平陽弔伊耆之休爍追
姚氏之烈光則見堯天永位舜日常熙四方以宅七政
以釐九州以奠百穀以宜五品以序三居以夷八風以
壘六府以治封十有二山之鎮弘萬有千歲之基迄於

今士尚讓恭民多醇古恍不識不知之眚一讓畔讓居
之度去華從儉則素題越席之遺也憂深思遠其暑雨
祈寒之故乎於皇哉唐虞作對夏殷繼昌神臯腴數鬱
乎蒼蒼雖巨鎮雄都未敢望也而何有於僻壤要荒

揚州賦有序

宋王觀

揚州古都會也枕江臂淮與益部號為天下繁盛故以
來節鎮首稱揚益焉今夫廢興之跡與夫風土人物貢
賦井邑之纖悉詳見於傳記可得而考因撫類次第而

賦之其詞曰

天鬻先生溺意藝文繇日窮年杞蹠蹕之短步鬱遐情而不宣悵江淮之去來閒走陸而航川徒跋跋而奚補寄赧色於頽顏睇故國之荒蕪尚氣象之嶢岬思抽毫而弔歎傷日月之徂遷環中丈人推手而前曰子非無文何為嗇辭華於一言先生答曰去來於茲十厯春秋或行役之不遑或疹疾之相嬰有所不暇丈人曰子今請邑此邦古今之廢興人物之賢愚封域之遐邇土風

之纖微貢賦之所出心詳目熟益已周矣請子賦之吾
將觀焉先生因驅撥冗猥滌慮操觚於肆厥辭嗚呼吁
獻策駟驢以出遊兮款近郊而驚春芳華冉冉以摧謝
兮俄汎然而點塵稅倦鞅於危岡兮俯樓欄而棲神哀
衰殘之戟目兮發古意之酸辛搜傳記之浩穰兮契口
耳之傳聞稽質乎地誌兮參諗乎乾文牽牛婺女流為
揚州南攝乎鉅海之澣北壓乎長淮之流包有吳越首
建楚周保章辨之以星土之數職方分之以畜產之由

茲惟陶唐置牧十二揚居其中世濟以治夏因商襲九州以異惟周封建各正其地季末解紐侯國爭利犬羊用人孰作藩衛羸秦咄嗟奄有神器煨燼墳籍變亂古制罷侯為守郡縣始置昧形勢之孤弱薄恩親於子弟下更晉漢南北分裂隋繼以興陳室復滅天下始一冠屨有別易州而郡法制未絕增置太守統以司隸有唐開府刺史分莅此牧守郡國先後變更而相異也環中大人復曰茲述其槩請道其詳先生曰然執筆而前惟

揚之先在周屬吳魯哀之年城茲邦溝遠通江淮見於
春秋後越滅吳用為寇讐強楚東侵廣地自謀抵於泗
上雄視諸侯楚復奄滅是為廣陵顧始皇之蜂豺覽天
下而吞并略長世之遠謀出須臾之經營郡始屬於九
江北立異於虛名偉項籍之姦雄置秦鹿兮相兵王英
布而開國俄劉邦之勃興草前人之故號易淮南之新
稱或江都兮創更或廣陵兮相仍首皇子之啓封復沛
侯之繼承彼得失之奚計間叛逆之為朋弔漢公之逡

巡亦異號於江平踵三國之紛紜作重鎮於魏邦彊幹
弱枝倚賢進良逮文帝之黃初幸故城兮臨江奮山川
之戎旅翦烟靄之麾幢志南渡兮已必卒冰舟兮莫航
目波濤兮稽天奪神明兮歎傷實皇天之限隔豈人力
之能障浪賦詩於鞍馬因縱美於湯湯曰魏與吳名號
相因統縣有八屬徐而紛繁晉末之驅馳控三齊之要
津逮宋有邦州鎮是隆擇刺史以惟人俾撫柔於土風
講盛事於嚴秋之月觀鉅濤於海陵之東俯江濶之壯

闔眺京口之穹崇歷陳梁齊之累朝卒更革離合之不
同一陳留而分郡一東廣而啓封復吳州而異稱示屏
衛於其中隋總管以名府顧舊名而是從眷煬帝之纂
圖詔修飾於離宮會殿脚分揮揖揚錦帆分翳空決東
幸而建都引千艘分戲龍戮忠臣而杜口括寡婦以從
戎獻無尾之羔兮絕繼作遭春之語兮凶終鵲集黼帳
血腥劒鋒徹牀簀以空藏痛精誠之奚依指雷塘之漫
漫仰楓林之巍巍本馳情於一快反植禍於當時數陳

稜兮留鎮擁大軍兮北歸眷天意之昌唐卒虬髯之見
幾叱咤暗鳴作興帝基承江淮之歸命更南究以臨之
外增置於行臺內維持於本枝武德而還寓縣輯熙或
邇或揚陞號都督貞觀之間十道分牧景雲開元增廢
遄速採訪處置道路擊轂縣延永泰之末創新節度之
目敕親王而領使慶皇宗之敦睦副以長史權任戒獨
跨豪華於天下駢十里兮雲屋此州之因草名號之大
較也擾擾後先興亡可錄吳王濞之不臣非子建之就

戮淮南安之自殺而始惡彗星厲王長之憂死而民歌
春粟非貪地以害公卒三分而承續紀陟之譬護寒也
知險要之必爭諸葛之誅樂琳也表誣辭而自贖文欽
之叛也因曲赦以示恩曹丕之走也駭疑城之在目沈
慶之設强弩於高臺今謹乎備禦吳孫權置烽火於孤
山兮驗夫神速蔣濟諷三州之論袁術哀馮氏之辱李
子通之暫據杜伏威之驅逐彼公秬之何知運螳臂而
相觸力未加而已喘息未伸而已促委雉堞於荆榛痛

黔黎之魚肉徐敬業之傳檄兮武后臨朝而慨歎田神
功之提兵兮劉展就擒而顛覆陰奏伯和之罪兮少游
之凶狡外匱南方之力兮李錡之貪黷唐控失御昭皇
蒙塵屬朱梁之侮國復漕兵之不臣沸淮海之狂波漲
寰宇之妖氛迨吳僭王楊氏始振行密亟亡渭溥稱尊
兵弱地狹器畧識昏亦猶指尾閭而瀦去水即虎穴而
寄蒸豚未有不亡者也夫然迭守迭攻代亡代存東都
之啓國倏大齊之自君始焉懼神謀之或泄默然畫爐

火而誰人咄嗟高駢跳吠狴狴叱海嶽以倒立噓風雲
兮晝昏忽埋金之行歷終故疆兮裹身呂用之之狂妖
畢師鐸之并吞孫儒厲言於庸賊秦彥伏劍於轅門時
雨降矣雖灌溉兮何益太陽昇矣顧小星兮徒云顯德
興周淮南克復撲燎原之凶燄起摧風之腐木赫赫然
我太祖之興也不取一毫不折一鐵何重進之跳梁逆
神鋒而自劬按九天之成法斷巨鼇之左足捧祥日以
出海乘鳴難而御籙民適父母天薦福祿冠帶百蠻兮

蠢然集慕羶之衆蟻束帛萬國兮浩然收朝宗之百谷
土歸民耕野無鬼哭括有幅員悉吾臣僕銷藩鎮之僭
謀宣皇明而外燭敕示守臣語吾約束掃戰爭之故地
變歌謠之善俗此州之聖愚興亡之明戒也長岡嶢嶙
西馳東走凜劒外之危勢吞淮天之遠岫帶楚水之縈
盤瞰吳林之森秀巨魚乘波偃然出壑長蛇吸煙翹然
引首高焉上摘於星辰廣焉環迷於宇宙四帳無所兮
失迷藏之樓萬點猶明兮餘放螢之園乏擊毬之壯女

悲喪馬之龍廐帝子去久兮空文選之樓雨蘚朝生兮
侵蜀泉之甃風飄飄兮引竹西之歌吹雨纖纖兮發貢
芽之香茂塔西靈兮軋空池九曲兮分溜杜子美思東
流而乘興朱長文目西山而懷舊風亭月觀琴室吹臺
屹萬歲之雕華對鍾山之崔嵬待玉鈎之初月銷丹楹
於大雷走十宮之孤狸鞠三陵之草萊魏水軍兮穿巨
池而分浦隋酺戲兮揭羽葆而橫街僊白尚存兮混草
莽之墟胥骸未朽兮感金玉之精植桂荒謝公之宅掬

淚傳秋浦之情筮山火以疑寺名之妖祥驚夢寐以登
峻臺之崢嶸望輿浦兮表瑞始乎范邈峙危城兮施築
本乎張嬰孫郎作涂塘而淹北道齊高分巨水而遏艾
陵此州之城邑山川樓觀之所在也所以庾闡縱麗言
於禦寇鮑昭攄雅思於蕪城因獻賦以賜錢兮酬王正
之才聞宮聲而疑變兮見令言之明客謝井兮起盧仝
之意表薦士兮示蕭遙之能張祐著浪遊之跡杜牧悲
薄幸之名歲告執籌兮揚子雲之慷慨詩弔故宮兮李

義山之縱橫訪木蘭兮偉王相國之貴渡金湯兮陋章
孝標之輕子瑱據城而生叛逆之志嵇康鼓琴而識禍
亂之萌騎鶴謂昔人之妄露筋哀正女之誠大中紀年
兮獲官河之聖米韋生避地兮悲水調之遺聲此州之
古今賢哲之所褒稱而悲歎也揚揚水波人實躁勁或
土多篠簜之材或地宜楊柳之性厥田惟下天草惟盛
利焉金錫之為美民焉男女之為正馳甍社之湖兮夜
駭乎明珠之光怪泛揚子之心兮朝出乎寶鑑之精瑩

袍美蕃客布出鮫人半臂美錦土穀花紋烏節早香蛇
粟連根蒟蒻竹笋蘆芽水芹海榴石楠松藻葵蕤荻粉
白芷松栝葛薑芡角翻刺蒲劒飛銍鵲鴨鸛雉狐貉兔
獐野不利穀畜不宜羊鰕鱣鮓鰕鱗鯉鱠龜鼈蜃
蟹蛤鰻魴螺蚌蛭蠃獮殼堅剛五都百郡千豪萬商趨
牀頭之冗會定萬貨之低昂天長甘泉蓮塘石梁積冬
雪之綏綏乘春霖之浪浪泥冰土陷輪摧馬傷張氏記
明於行殺李巡注釋於輕揚采得寶之歌兮韋堅進官

於常侍興壯埭之役兮謝安獲美於甘棠奇乎哉瓊花
吐英芍藥矜芳媚靈宇以敷秀覆修亭而舞香其潔也
御綠雲之玉妃其美也奔素月之仙妝其色也照時春
之藻景其馨也破真室之罌香友姚黃於西洛奴玉蕊
於唐昌至於雜樂奇戲歌童舞倡結豈菴之春梢艤珠
簾之密航九橋連居善和名坊揚柳發孫生之句牡丹
為李氏之光姓氏之出其源章章劉馬鄭盛韓林車張
戴高槐游茅冷蕭王此風俗物產氏族之所出也兩京

而降五代以還人物之詳善惡可觀微至於棲巖遯谷之士下至於羈臣寡婦之賢董子諫易王之驕志何武寬戴聖之微愆吏民刻石頌馬稜而懷德祠祀祈福祝張綱而致虔趙苞成三年之政徐璆謝上公之官劉馥先一時之備出苦蓑而復壘陳登當東方之事合部衆以安邊事大見委分責溫恢之效以函致問分尊劉曄之言政治尤異三府薦臧旻之績鎮撫安靜郭謀言滿寵之德張玄不逮子綱而雅有高行張遼至自海陵而

今猶血食笮融利財奉佛而忘督運之急孫景委郡東
歸而得見幾之力陳瑀懼李術之集兵周瑜識蔣幹之
說客陸伯言之先幾而知楊竺之終敗糜子仲之傾財
而資先主之軍食器中驚若而老姥不聞於增減帷下
燕客而桓溫恥崇於雕飾劉頌博識而見稱時人盛彥
異才而不應召辟華譚好學而取貴乎鄉里惠休復姓
而晚階乎仕籍開南門而必王兮恭陵胡為乎反禍實
根本之所寄兮劉氏於焉而深惜荀伯玉夢稚兒之語

呂僧珍遇師相之識白虹貫城而義慶以之懇還十年
養士而季崇以之破敵老能馳射者傅永之好勇畏如
神明者蕭景之舉職方隋之時趙才裴矩之從幸其止
輦抗辭毅然而不佞志一朝兮已決言百車兮孰聽指
血染鞅兮徒為乎宮女之留輿服羽儀兮徒為乎何稠
之定李襲譽非特築句城以興利也復聚書而訓子王
志愔豈惟破凶滑以示信也先保民而為政吉甫徒壽
州也求行乎招懷之策德譽惜丁黃也力沮乎智興之

令叅佐不用明李鄘之失郡人紀德見姚崇之正倪若
水因班公而有登仙之慕陸鴻漸對季卿而別中濡之
性南柯駭淳于之夢沙堤發李嶸之詠臧珍對世宗言
卑濕之狀田頔諫揚氏喻狂猛之心賈崇失律懼元宗
而受責馮謐削髮遇周師而見擒環中丈人曰子之博
聞吾已詳知子之凭高睨下或得於古或得於今人之
所不得見而知者試為陳之先生怡然布席揖座觴三
行而已醺徐為丈人言之引目迢迢邈不知其所極也

無心迴迴恨不知其所至也倏隆倏平闕絕頽危勢相
睽而不屬者此前日之廢城遺堞也斜分直出東西左
右而名不質其孰謂者此前日之市朝街陌之故處也
殘刻斷礎燒昏草沒而牛羊牧放之所憑陵而上下者
此前王之離宮別殿也累然而峙訝然而空穴狐鼠宅
虺蜴棄於人跡所不及者此前賢昔帝之壞陵廢冢也
前日之綺羅鼓吹之坊今日之芸童樵叟之歌場蔬圃
也前日官寺法度之所出而今日之浴牛飲馬之斷溝

荒塹也齊綠高陰局分而井列者此芟麻桑柘高下之
畦隴也似出而沒若來而去非圖繪筆墨之所可形容
而盡者此荒煙野霧朝暮之氣候也茂林陰陰挂晴日
也白鷺翩翩戲平池也遠水沄沄艤舟舫也羣山亭亭
帶長江也疏花綴草天天灼灼訢春情也修篁舞煙曳
曳徐徐縈客愁也怒蛙沸雨怪禽嘲暮行商去賈千蹄
萬檣南浮而北走者不能誰何其一二也是以思紛然
而蕩越斂而不能相合言屑然而躁冗就而不能少功

夫然景物之夥不為大人道也敢肆其所可道者大人
姑聽之因屏息整衣受揖而立端以俟命皇乎哉我太
祖之有天下也進賢黜愚定羌服胡分茅裂土而啓十
友之封銜壁輿觀而赦諸王之誅萬里一統混同車書
粵茲維揚古曰名都屏扞京師世倚賢儒唐季彫微羣
雄角趨寄人命於戈鋌委城雉於榛蕪誅殺蹂躪倍削
驅呼政察察而不綱下嗷嗷而無餘一祖經營四聖扶
持逮皇上之興也天覆地容風養雨濡振厯世之衰殘

造太平於須臾四海九州稱唐頌虞士樂膠庠商通有
無工事於器民安厥居老舞少歌其氣于于實惟神州
東南奧區併邑治以簡役廢軍壘以寬租江浙甌閩交
廣湘湖摩轂銜尾駢走津途蓋鑒前季之興亡建永世
之規模儲粟穀之千倉宿驍雄之萬夫擇將臣以嚴訓
御之法制尊牧守以絕鷹虎之侵漁淬蘭錡之戎械增
堅金之外郭崇中國之藩垣銷姦人之覬覦言未及既
環中大人委杖出席拊髀爵躍失氣出舌乃曰賦者古

詩之流古人所以通諷諫也今先生之言磊磊崢嶸豈特詳一州之事舉而措之足以彌縫帝袞龜鑑當時天鬻先生跼蹐戰汗恍不知其所如百拜以謝定色悉記將以俟采詩者也

寧海縣賦

有序

宋儲國秀

孫興公作天台賦信耳聞而任臆度寧海其東麓也事或湮沒而弗著獨一丹丘存舊名而臨海天台交有之莫訂其實余家寧邑蓋五世其山川里社之所隸人物

土產之所鍾有親見非剽聞有諗知非臆度也矧夫皇
輿塘錢塘邑在五百里甸服中聲教濬滌精彩呈露月
異而歲不同顧以千百年往事槩觀得乎暇日繙故書
因命子墨賦之詞之淺薄雖不諧金石聲以取譽於時
原古備今聊以補前賦所未及云

有客自東都來問於桃源主人曰吾行天下周覽山川
九土之別揚州台嶽未發於神秀六朝之都建鄴寧海
罕著於名賢堪輿閭而弗耀圖諜佚而無傳子居是邦

顧聞其所以然主人曰客亦知夫天施地生之有消長
古往今來之有更禪者乎以吳越為蠻索春秋之所同
貶以台明為瓌富詞人之所深羨惟晉太康吾邑始顯
截回浦而置郡析章安而為縣初宅白嶠聲迹歲遠旋
卜海游規模日淺今遷治於廣度得形局而恢展背烏
石之宮崑腰玉帶而回轉橋亭橫界乎兩街市門旁達
於四面祠應三台之頃臨井象七星之分建方祥符之
奉帝真新皇祖之登御殿藩府之儀式崇十節之侯謁

見乃紹興之定庠揭四教之堂扁屏門闌之囂誼儼麗
澤之淵泣祝聖則放生池之記複出勵賢則釋褐坊之
題壯觀祭社有壇以重先農之祈報登陸有亭以隆過
客之賓餞爾乃六卿冠蓋之都會千室絃歌之數闡隸
方畿之繁邑非邦小而滕福其山則東有帽尖蓋蒼之
絕巘西有桑洲桐巖之卓峰峴城矗立於南鄙天門昂
峙於北封三十六雷當其肘一十六窟蟠其胸跨古岫
而上寮斗蓋梁宣王之舊遊韋踰摘星而入瑞雲又佛

雲猷之詒經從坑橋之虹石梁杳通蒼蒼蔥蔥仙巖之
峰洞天幾重穹穹窿窿竒龍勅虎嶮怪龍崧雲情雨狀
變現洪濛康樂思登而泥武文舉願從而遲蹤其海停
納萬流宗長四瀆控直港於稽鄞引大洋於溫福出烏
崎通鴨綠睇日本睇暘谷合鎮都而為五十二隸海嶼
者有三十六馬筋滉漾之鄉匯閭尾而吸長川黃渡湍
激之勢架修梁而接平陸緱城以北厥壤既隩歎鯨亭
之舊築浮門之曲廡聚惟簇陳長城之故族一日再潮

陽往陰復千艘萬艘東奔西逐元興觀之而難言子虛
賦之而不足其野則有郊垌原隰溪澗洞潭其平如掌
兮通適其峻無涯兮巨探視涓流而過坂兮為砥為剛
望朝氣而竟野兮為霧為嵐風挾颶而震遠雨拖浪而
蕩炎居毗安之而生聚神物憑之而隱潛爾乃培厚而
百家集淵深而萬有涵薑畦富於松壇黃社蔬圃利於
後洋溪南苔脯擅奇於古洞茶筍毓瑞於寶巖峽石嶺
奴魁蹲鵠而軟滑栲溪楮友方剡藤之瑩纖九頃蓮芡

得水澤之富三洋椒漆宜土性之咸竹蕃於筍筋淡苦
木盛於櫛樟松杉其卉則萱蕉葵蒲艾蓼蘆葦而灑然
秀出者惟蓀珥蘭簪其果則李柰榴栗桃杏梅枳而磊
然飮座者惟香橙乳柑其田穀則秬秠總總而利獲於
海塗者相倍蓰其陸種則麻菽稷穉而歲收於山貨者
常二三藥物誌於簣窗者大半菊種譜於南塘者相參
厥草芊芊兮長重脂之野厥桑黝黝兮登五熟之蠶鑿
埴則梅村之沙成鐵熬波則長亭之土成鹽以至惟錯

之珍所產者多鱸脆蟹肥螺珍蚌柱蠣牡鰕魁望潮章
巨蜆含膏而團臍蟹凝油而塞肚鮫通黃而縈金相鯨
柔白而懸銀縷新婦臂婉而凝脂老嫗帔長而曳組舊
總謂之魚鱗鮮賤不論於分數若夫滂漲而河豚生汐退
而彈塗聚蛇沫浮鰓黑照鼈車攢蠔山豎修帶如篋斑
鹿頰虎鰓目之比如瞪魴背之鈎於鋸鯢梅之輓如束
鮎苗之多於泰鯧楓葉之標輕鱧竹夾之癯露加之鯢
鰻鱗魴之黨類蚌蛤蛭蛭之儔侶水經失於登載爾雅

昧於記注名不周知品不殫舉於是術逞詹公巧兼任
父隨搜收於緡罾賸堆貯於鼎俎又有鯉鯽細鱗鮎鯪
吐哺蛙蟹產於疇塋鱗鼈穴於沙渚澌澌渴渴洋洋圉
圉雖水族之殊科亦海物之同與礦石涸於蛇盤之丘
石首發於洋山之嶼工師鑽堅而齧分舟人冒險而漁
取磨礮礪砌以供百家之常需膠鰓鱗鮓以通四方之
販賈此雖方物之所宜抑亦他邦之鮮伍而況東南正
氣界截海邦霞嶠月嶼鍾英孕芳曩以去天之遼邈超

然避地而退藏至屈氏子廬於湫水之澣梅長者棲於
鳳山之岡曰鐵場則有若張少霞之藥鼎曰桐柏則有
若葛稚川之丹房雖啓靈而著述迄鏟彩而理光偉宋
德之當天同文軌於殊方崇姬孔而抑聃釋業文策而
變工商越嘉治祐宣之熙洽聯周王羅李之騫翔赫名
第而起晦闢井社以勵荒迨六飛之度南廣仁澤之延
袤東西王兩族之望左右許一門之秀疏學殖之根源
競賢路而輻湊鄉貢之家比比乎連甍橋門之彥翩翩

而結綬或騫華於童習晚恩或擢穎於宗英世胄或文
武科之踵升或內外優之疊奏或能流光於宦業匪徒
角勝於文囿爾乃白屋公卿青雲步驟烏臺騎省之出
八虎節菟符之先後重典選於春闈侈歸榮於畫繡簪
筆素以對天光典樞衡而應台宿等而上之來者靡究
更有尚清修而立門戶輕進取而安里廛泥滓名位膠
漆林泉瀉陶篇而杜什藐島瘦而郊寒蒙菴文會襄陽
之耆舊閬風詩侶江西之派源或闢野堂而講學或儲

墨藏之遺編或守柴桑之廬而厭仕或結香山之社而
逃禪信君子之行藏表鄉里而率先士得師於庠塾農
勤身於桑田工執藝而精良商通貨而貿遷舉樂道而
懷德知委順以安天於是俗化明表裏正有事生事亡
之合於理有為婦為母之一於敬守義者却婚於崔盧
篤教者媿賢於陶孟茲陽倡而陰和猶宮動而商應若
蔡貴嬪則垂國史之懿範若汪李氏則著郡記之賢行
厥惟風教所闡非但室家相慶亦或厭世味之甘辛悟

法身之清淨傳祖遠之衣鉢擅上方之名勝惟此舊俗
安於遐陬不從軍而走馬不帶刀而賣牛僅守田園之
業以紓衣食之謀彼錢氏之僭竊奄全浙而誅求遞逢
迎而加賦苦椎肌乎何尤獨陳長官如魯中牟厯上書
而爭詆寧委身於繫囚直挽回其毒手得輕損於苗頭
迨夫錢俶納土而後皇政優游閔赤子之彫憊從寬典
而撫優由是歲月久雨露周主意渥宿瘼瘳立縣渚之
鎮以警鄉落之狗鼠設臨門之寨以壯屯衛之貌貅寬

稅斂於經典弛酷權於糟丘免身丁而生齒有滋蕃之
益行義役而鄉鄰無糾決之讐遂百年之聚族溥一同
而蒙休又況氣數幹於定理矩矱係於操修赤城經行
之日著拙齋生徒之雲稠寓黌舍而象繪備烝嘗於春
秋植公道之赤幟屹砥柱於中流後生宗之而自勵末
俗聞之而不偷且夫自有邑里以來希見兵革之事表
晁狂徒竟殲於十二保橋呂囊殘黨隨撲於清泉山寺
二難既消寸鐵不試晏然媯葛之居民真若仙佛之樂

欽定四庫全書

和州府志卷六

地子來幾日談何容易客再拜曰吾儕小人麤明大義
茲固道聽而塗說或恐俗殊而政異敢將狂夫之言以
發主人之意海濱斥鹵旱乾無備三日不雨則田龜折
而枯焦一穀失收則民憔悴而狼狽枯富家之儲贏仰
客舟之米至此合推廣社倉之成規以為凶年之久利
萬戶酒酤沈湎荒恣大家造年計以糜穀細民乏朝炊
而求醉是雖郡國之委輸終亦縣家之枵匱此合稍復
發賣之通規以貯公私之元氣官弱民強誰實誰崇治

邑者憐憚而不問攝事者苟且而不治此安得關中司馬洛陽康節之復生以主鄉邦之公議余亦言外之散人或干狂謀而出位主人矍然起而謝之曰客固咎吾之不言而未知吾所欲言之志就厯敘於篇中以備觀風者之所采

小函谷關賦

明
李元暢

關為前守吳公國倫所築蓋重地也題詠者備矣而賦獨闕李子補焉詞曰

歲在重光協洽蚩尤氏為祟乃迫上帝下攬槍降獍狂
鍾為妖虜來自東方虎視我高郡鯨吞我電陽蠶食我
鄰宇麇奔我疆場鬼燐青野骨白陣雲黑戰日黃時則
有太守如羊開府其人者輕裘緩帶一鼓殲之而累卵
之城固若金湯太守曰未吾聞劒踰蜀破峭入秦亡重
關之設有土者可廢而不講乎於是齎城以北得天險
巖巖類函谷者雖小而足以守國乃召虞人庀材公倬
削墨許少施巧秦成效力跨峻坂以啓扉因斷礮而衡

閩一九可封萬夫莫敵前抱啼猿之峭壁石路線牽綴
以卧龍之粵宅盤嵎谷旋既臨深而履險懼身墜而目
眩魂黯銷以失度足趑趄而不前山河爭百二之雄壯
門戶總四八之喉咽當其空林叫狐深莽匿貌司疆舉
燧猛將彎弧則斯地也貔貅屯而霧暗鼙鼓急而風鳴
悲笳咽而月落高壘出而煙孤田文不能以宵遁郭丹
奚自而買符若乃運際熙平嶺海澄清旌旗畫卷刁斗
夜停則斯地也可以命東山之屐可以賭別墅之枰可

以泊赤壁之棹可以奏流水之聲可以張筆陣列酒兵
嗟乎世不常治險不在地有德則依無德則棄獨不觀
於函谷之故事乎以贗鼓而踏秦鹿以衰博而興漢龍
信地利之易失而人和為難攻是故善守者壯干城於
仁義坐樽俎而折衝不鎖鑰而固不保障而雄客有度
闕而傷於衷者歌曰洪濤激兮古木重雲霞深兮瘴癘
空安得泰寧兮齊吳穹西出兮豈無老氏東還兮誰識
終童

荆湖山川人物賦有序

明韓楊

賦者敷布其義而宣敷其事也荆湖為南土鉅藩山川
遐曠民物衆多欲以寡陋敷而敷之未免挂一漏萬特
錄以附門人暇日觀荆湖山川人物之槩庶知其一二
君子見之幸毋謂焉辭曰

海內名藩江南列府按禹貢以為荆書春秋而曰楚疆
連百粵之區界接三吳之土拱京師以通貢獻之衢鄰
黔蜀而居要衝之所編氓之戶口衆多商旅之舟車旁

午人材盛於我朝物產饒於前古試姑陳其一二曾不
揣乎愚魯若言夫州郡之名稱兮長沙間於衡岳興國
隸於武昌蘄黃來漢沔之水德安徃隨郢之方澧州舊
屬夫常德均州今轄乎襄陽荆南通辰沅之域寶慶接
道永之疆桂陽鄰於郴壤靖州抵於武岡歸州處夷陵
之上荆門依南郡之傍沿革不一建置靡常遺基故跡
未暇悉詳以言夫山之衆也望兮則前巖後岫之靡窮
數兮則疊嶂層巒之無盡八面兮崔嵬五嶺兮高峻幕

阜兮千尋風門兮百仞三十六洞兮幽且深七十二峰
兮遠而近余獨尊乎南嶽之衡山兮乃一方秀氣之鍾
孕邀泰岱以齊封兮拉會稽而為鎮以言夫山之所藏
土之所產也穀兮則有稻粱秔秬之粢黍稷粟麻之味
麥有蕎菜小大之殊豆有黃紅菰黑之異公倉賴之而
充民食資之以備蔬兮則有瓜茄蔥韭蒜薤芥薑菰甜
蘆菹兮宜食菠稜萵苣兮可嘗又有絲鯨之帛芋葛之
布可以用於暑炎可以禦夫寒沍木兮則有楠樟槐柳

松柏椿桐桑榆梓漆楮柘檀棕楸杉檜棘榦柏櫨楓冬
青白楊用各不同可以制器可以為宮竹兮則有猫笙
慈苦之名青白紫斑之色笛箭水蘄用皆有益果兮則
有梨栗棗柿李杏桃梅葡萄兮秋熟盧橘兮冬開芡菱
蓮藕兮湖池可時石榴橙橘兮苑園宜栽可以薦於郊
廟可以侑夫樽罍藥兮則白朮桔梗柴胡香薷烏藥山
豆黃芩地榆細辛枳殼葶藶萊菔雲母之石仙靈之皮
亦有黃柏金櫻紫蘇蒼耳桑白朮花麻黃枸杞木賊牽

牛荊芥白芷厚朴菖蒲門冬附子瓜蒌茵陳貝母薏苡
野葛之根山梔之子及有薺蒼芍藥半夏南星糖棗白
芡薯蕷黃精沙蒨紫苑地膚決明五茄通草百合茯苓
楮槐之實金銀之藤夏艾之葉秋菊之英可以衛生而
濟世可以益壽而延齡花兮則有牡丹芍藥薝蔔蓮薇
鹿蔥罌粟瑞香蜀葵海棠石竹山茶木樨水仙月桂迎
春茶蘼金燈無葉紫荊有枝鳳仙呈瑞玉簪獻奇春蘭
馥馥秋蕙馥馥雞冠與芙蓉共景菊華偕木槿同時以

言其禽之類分則有鷹鷂鳩鵲山鵲竹雞鷓鴣鴝鵒鷓鴣
鳩子規黃頭秀眼白頰畫眉山鷄夜叫野雉朝飛白鷺
草宿紅鵝樹棲鷓鴣百舌逢春則啼桑扈布穀其鳴夏
時鷓鴣伯勞人皆惡之以言其獸之類分則有牛羊犬
豕馬鹿騾驢獐鹿猴兔虎豹熊羆猿豺獾獺貳貍狐狸
或祭其肉或貢其皮以言夫水之多分江湖河港溪澤
潭塘初焉脈脈已而湯湯三湘來洞庭之右七澤出漢
沔之陽衆溪分九江之派諸汭繞三澨之邦或石多而

改定四庫全書

御定歷代賦彙補遺

憤兮形於騷辭黃文強之孝道兮出乎天性囊螢夜讀
兮武子之車泣笋冬生兮恭武之孟至於名宦兮若山
甫有樊國之封蕭何有鄴侯之命又將仲謀之將佐多
才孟德之奸雄莫競故魯肅次伏江之兵而周瑜司赤
壁之柄羊鉅平隴淚之碑尚存杜鎮南沉潭之石堪並
陶荊州運甓之勞庾開府登樓之興往事紛紜率爾難
罄姑以近代而言唐宋諸賢尤勝其道學兮則有程朱
宗周子之淵源其文章兮則有李杜偕韓公之題詠岳

麓書泰和之名浯溪勒次山之姓宋郊聞蟻渡之徵馮
京著馬涼之應迨我皇朝益隆愈盛茹少保忠誠之封
允宜劉翰林文學之任尤稱德行政事兮湘陰之夏公
忠靖文章功業兮石首之楊公文定餘則任臺閣兮有
拾遺補袞之才居藩臬兮有致君澤民之政或由經術
而登科或以才德而應聘達士偉人前輝後映仰惟吾
皇之憂勤兮賞罰一出於正尚慮是方所任之非才兮
猶博詢而廣聽其命官也於藩憲兮則舉夫廉公厚重

之臣僚於郡縣分則擇夫循良愷悌之守令仁恩洽乎
人心兮禮樂陶乎民性是故溪搖帖帖以輸誠峒獠蹲
蹲而致敬山林之鳥獸無驚江漢之風濤以瀟家家全
事育之惟處處樂昇平之慶伊欲究其所由實有賴夫
廟堂柱石諸賢以佐吾天子之神聖

張秋賦

明
楊守陳

駕餘艘以南邁兮經齊魯之故疆何石堤之歸吾目兮
夢千里之垂楊顧僕夫以咨問兮曰充郡之張秋曩河

決於此兮奔滄溟而橫流漫泰稷之方疇兮奄千頃為
一壑渺風濤其洶歟兮汴蚪龍而舞蛟鰐民居蕩折兮
舟楫沉淪嗟彼河伯兮一何不仁貪婪百川兮吸濟沈
而吞汴漕渠寢涸而將涸兮僅涓涓其如綫萬艘鱗集
以擲比兮悉膠杯於坳堂壅萬國之經絡兮撫兩京而
搯其吭堯以洚水為警兮咨伯禹其焉在共與鯀而相
承兮幾精衛之填海捷石菑之鉅萬兮付一髮於燭爐
役夫續其荷鍤兮倏皆化而為魚河與歲而偕逝兮公

與私其同窘日筭筭培克以蹙民於流亡兮有人心其
誰忍幸河流之他徙兮築斯堤其若墉乃售偽以叨榮
兮自詫纂禹之神功若強敵之負固兮師老才殫而弗
克俄大醜之自殞兮濫刑誅以為慝嗟彼偽之一售兮
志淫淫其益逞再售而邦其殆喪兮卒自歸於陷阱歎
世時之每下兮紛售偽其日繁戮懷中之赤子兮謂翦
狄而平蠻朝捷書之方奏兮夕羽檄之已翔曾不若張
秋之一築兮歸至今其猶罔吾恐衆偽之滋售兮將百

叱之並罹羣蟻穴其不塞兮潰千仞之長堤倚危檣以
曾思兮涕潛潛其若霰顧四海之在念兮於張秋乎奚
歎

金橋賦有序

唐潘炎

金橋在上黨南二里常有童謠云聖人執節渡金橋景
龍三年十月二十五日帝經此橋之京師賦曰

汚彼流水兮清且漣漪度木為梁兮於焉在斯成金橋
之巨麗得鐵鎖之宏規當其受以金模觀其曲而經始

也則大火朝流成功焉乃天根夕見彰於聖德發彼謳
歌千人唱萬人和丹腹蜿蜒倚晴空之蟬竦瑰材櫛比
超渡海之鼃鼃人且告符功惟用壯非填鵲之可比法
牽牛而為狀鶴鳴陰處雁覆晴川昇東明擊水而投步
匪秦帝驅山而著鞭惟彼童謠兮言猶在耳大人應運
兮奉天而起乘彼橋以徑度按周道以如砥於是提三
尺乘六龍懷萬邦八九重

躋雲橋賦

明滕陽王

滕子舊封漢蕃故治世家見遺於遷史山川僅存於班
志合郎薛以拓疆介徐兗而建置地分兩都之中路總
八省之會雉堞翼翼以北拱諸水泱泱而西逝瞻彼梁
溪帶我城陬爰有石杠跨彼洪流雖習坎於春冬每盛
漲於伏秋水之汪也如歸乎巨壑橋之隘也若扼其咽
喉衝激則傾柱而裂石汎濫亦沈陸以浮丘膠行李於
泥塗阻賓客於置郵苟津梁之不設誠遠道之無由賢
者經營兮歲維敦牂命五丁使開山兮輓牽牛使服箱

藉鞭策於神人兮法精鍊於媧皇伏靈龜以負砥兮比
龜鼉而架梁虹影穹窿以曲抱兮龍勢蜿蜒而橫僵象
支機而列表兮擬霞標而建坊當其晨光初開煙霏未
散遠而望之似吳門之曳匹練至其皓月既升星河俱
粲俯而視之類閣道之絕銀漢白獺深穴而莫嚙蒼蛟
被創而下竄秋水時至濁潦灌川軋磐涌裔滌汨潺湲
如振如怒乍却乍前莫不按疏門而分浪修虛窟以輸
湍其奮迅騰沓如秦師襲鄭超乘而過成周其清升踰

跼如漢軍擊楚東馬而度重關故夫天子開明堂而受
計方嶽首燕路以趨塵車馬輶殷以奔雷冠蓋縹緲而
承雲公車才子揮彩毫而題柱建節使者駕赤駟以迴
輪逐臣去國愛子從軍披塵襟兮傷遠道舉征袂兮泣
羅裙又如妖麗名姝游閑公子高堰曲堤清明上巳度
金羈褰羅綺泛霞觴零芳芷長袖嫋嫋以覆欄靚妝盈
盈而照水別有至人冲漠達士恢奇或冥搜以獨徃或
因教而赴期忽成仙而化遼鶴亦受書而為帝師仰孔

民之化育悟莊叟之玄機觀鯨魚之遊樂翫雌雉之得
時嗟夫悲歡異情靜躁殊向利用皆然信美難狀斗子
殊沿於俗傳躋雲略名其想像非夫濟巨川之才安得
致青雲之上看世路之坎壈孰有若斯塗之坦蕩者乎

欽定四庫全書

御定歷代賦彙補遺卷六

御定歷代賦彙補遺卷六

欽定四庫全書

御定歷代賦彙補遺卷七

治道

仁者之言其利溥賦

宋劉弇

君欲圖治臣當志仁至矣斯言之告溥哉為利之均始
陳溫厚之辭徐裨庶政終致休明之澤廣被烝民夫惟
四海之廣無窮一人之臨至寡謂為之法制雖係於君
上然物之寬恕實藉乎仁者優游亮直來篤論於上聰

普博淵深洽湛恩於中夏誠以惻隱之德素備憮怛之心內持一啟沃盡蓼蕭之澤一贊襄皆行葦之慈禍貽無俟於後悔罪苦靡容於橫罹凡有說也民皆利之觀過斯知方自立談之頃成功則一果周時措之宜膏澤於是下乎民匹夫無不獲其所方明已任之莫重豈止悔亡而有序淵若達德藹如法語推陳賤踊嘉晏子之告齊別白蹊田美叔時之悟楚豈無厚貌終身戚施豈無邪說觸塗詭隨蓋愛已甚篤則愛物亦至而處情彌

厚則處人豈欺是必取布帛以兼暖恥風波之數危慮
既及此言斯善其大人格君之非初不勞於自反惠心
盡物之願曾莫見於容私故夫物則能供其求以民則
皆受其賜濟人何補於陋術移粟何啗於末利又孰若
天回上聽之默識仆起積年之弊事已殊咸口徒深轉
末之滕無取屯膏終愧未光之施厥後俗既持薄說非
用情鄙矣嗇夫之便捷紛然戰國之縱橫膏脣拭舌而
何有理奪剥膚椎髓而適資患生繁或勝簡偽斯奪誠

利口覆乎邦家悲聞班固傷人甚於矛戰歎起荀卿異
哉守中無待於多言寡信或生於輕諾蓋世濟其美者
由反君於道民受其弊者亦逢君之惡故知仁人之言
其為利也博

刑統賦

宋 傅 霖

律義雖遠人情可推能舉綱而不紊用斷獄以何疑立
萬世之準繩使民易避撮諸條之機要觸類周知竊原
著而有定者律之文變而不窮者法之意文有未備既

設於問答意有未顯又詳於疏議刑異五等例分八字累賊而不倍者三與財而有罪者四私貸私借皆以字為法餘親餘賊各隨文見義子孫非周親也或與周親同曾高同祖父也或與祖父異賊非頻犯者後發須累於前發身自傷殘者無避亦等於有避毆不必告也有須告乃坐之毆詈不必聞也有親聞乃成之詈盜親屬猶減等何況於詐欺詛父母為不孝可明於厭魅許嫁有私約知殘疾養庶之流損人以凡論謂鬪毆殺傷之

類觀夫首從之法有正而有權加減之例或後而或先失官物不償也坐而又償者以持守之別盜衆財必倍也累而非倍者猶掌富之專罪因搜檢而得者許推於狀外事須追究而正者聽言乎赦前出舉得利非物之蓄息棄囚拒捕亦事之因緣誣輕為重者反坐所剩從杖入徒者罪論以全會赦會降有輕於會慮議親議故獨先於議賢配所犯徒杖不過於二百流刑加役里亦止於三千又若親姑被出亦是親姑繼母改嫁即非繼

母責其已越則未過重乎未度矜其稍遠則不舉輕乎
不糾故屏服食論以鬪殺貿易官婢同於和誘併贓類
併法也而法兼於贓本部如本屬也而屬尊於部詐傳
制書情類詐偽私造軍器罪加私有言其變則或嚴未
得之始語其常則皆重已然之後主典不原於覺舉官
物宜吝於給受已讐而竊則親等他人可以殺傷孰謂
扼喉之輕毆議夫制不必備也立例以為總條不必正
也舉類而可明官司捕逐法寬於救助主守故縱理異

於聽行借物係監臨者車計庸而船計賃買贓非盜詐者流從重而徒從輕罪不首亦同自首盜已成猶為未成義勝於服則捨服而論義情重於物則置物而責情手足法齊於他物繼養恩輕於本生孫同於子者立以承祖契同於符者用而發兵替流之役無丁難準徒加杖同罪之刑至絞即依例除名大抵情偽不常也宜以萬變通色目有異也難乎一槩理留住本為於工樂稱人不及於奴婢部曲娶優於雜戶伯叔愛隆於刺史妻

非幼而准於幼女稱子而異於子五服定罪有親同於
疎六職計貫或終如其始相侵不辨於尊卑相犯各加
於彼此誤殺係尊長者科之以過失對燒非積娶者論
之以棄毀篤疾顛愚亦合於三舍輕囚就重聽移於百
里事大不論乎失法重尤矜於死罪相為隱外止及於
祖孫理真減科內不行於兄姊信夫犯不知者輕必從
本親相殺者律必依常雖戲雖失而不從戲失親故乞
索不論於挾勢噫更之於法也知非艱而用惟艱宜盡

心於議刑之際

無逸圖後賦

有序

宋陳普

陳時中見寄用其語意再作

彼美人兮心鐵石相厥君兮憂厥職求矩矱兮孰我同
有袞衣兮作無逸君子之作無逸兮殷三宗而三王申
之以告兮七嗚呼而成章艱難以箴砭兮耽樂以膏肓
拜首稽首誨言兮夙夜基命不敢康刑措不用兮實以
此致吾感開元比隆兮若涉淵而求濟數百字之炳炳

兮畢寫以為圖圖成上獻之君兮曰此不可一日無按
勤政之垂意兮非不茲鑒何山水之據易兮心先圖而
昏暗肆志聲色兮夜梨園而日華清委務姦邪兮相卜
林甫罷九齡蜀道間關兮誰使洒沾襟之泣西內淒涼
兮誰使遭露刃之驚逸之為害也至矣悔不篤信兮文
貞嗟不復見兮文貞

淳賦

元
袁
楠

粵若邃古仁風熙熙擊壤灌陰以佚以嬉巷無夭瘥物

無癘疵祥麟應圓靈龜負池樂以導和禮以斥衰翮翮
其春渾渾其天守冲若虛不夸不鑄佩規帶矩養於深
淵擬諸樸兮文理具宣擬諸象兮充然渾完見不以迹
視不以形斟酌太和胚胎粹精居之莫疑神惟一清若
有若亡訖莫可名二儀絪縕肇分化醇人行乎中孰全
其真注茲玄酒澹兮在尊御史氏尹敏學潛珍服習典
謨葆厥靈根齋居靜儀人莫可聞考諸庖犧其名曰淳
擬越裳獻雉賦

明
張元忭

繫周之興也漸仁磨義累洽重熙肆成后之幼冲儼宥
密以臨基輔周召之同心登運祚於昌期太和氤氲於
兩間禎符昭赫於四陲慶雲覆兮若蓋甘露降兮如飴
靈郊廓兮麒麟遊帝庭敬兮鳳凰儀庇洪庥兮宅八埏
敷文命兮式九圍乃有卉服尚夷鳥音越裳雖正朔之
匪加訝海波之不揚曰中國其有聖人兮重九譯而來
王唯茲白雉誕此殊方竒毛皎兮灑雪妙體皜兮凝霜
抱太素兮獨全覽至德兮下翔炳乎文明之象爍矣聖

世之祥虎拜稽顙筐筐是將祝天子以萬年求錫福於
無疆在周之先燕謀肇迹白魚躍兮入舟赤烏戢兮止
屋鳩關關兮鵲巢應麟振振兮騶虞育帝眷德兮永徵
諒後先兮同輻嗟禽鳥兮無知胡得氣兮斯速矧戴髮
兮含齒寧自絕兮遐域嘻吁乎興王務修德以柔遠明
主或閉關而却獻危莫危兮履盈盛憂莫憂兮耽佚宴
旦謙讓兮未遑亟怠荒兮是諫茲聖哲之嘉謨歷百王
而為憲敬納誨於丹宸尚兢兢於宵旰

擬越裳獻雉賦

明
劉元震

伊蒼姬之崛起邁鴻龐之昌時繫德茂於奕世洽人文
乎來茲成誦紹天以闡繹公旦篤棐而勤施爾乃頻光
明之早譽竑廠詰之緝熙穆迓衡而旁作襲文武以重
輝邇嚮兮膠固逖聽兮風馳八表兮安瀾九有兮覆盂
昆蟲兮閭澤羣彙兮歲蕤釀泰和於宇宙調玉燭於璿
璣允功成而治定聿興樂而秩儀湛恩汪濊威靈霧注
雲行川涌日煜雷殷潤之如海涵之如春德上際而下

蟠澤北暢而南浸雕題貫胸之長文身斷髮之民莫不
滌瑕穢而鏡至清慕諛誼而浴淳仁跂足引領率服咸
賓邕邕踴踴振振如也於是南夷之南爰有越裳振古
以來不通梯航至是挹玄流耀末光企巍巍拱明堂齋
希世之珍禽充庭實之圭璋發舟徼以北征越珠崖而
相羊歷炎風之歊蒸度瘴江之淼茫望辰極之綽綽趨
神州而來王藉九譯之頻繁遂至止於周疆於是叩關
蒲伏仰而言曰蓋聞聖人出海波安莫清寧颶風潛令

茲之瑞積有歲年矣。亶中國之有聖君乎。何溟渤之澄
以恬也。最爾遠人。竊效尊親戴天履地。涵惠泳仁。爰獻
白雉。以作賁琛。天朝享之。賁此殊垠。夫王者德及於天
則列星明德。及於地則百川平德。及於萬物則靈植秀
而奇羽呈。今覬雉也。謝文錦之陸離被雪。毳之純晶。皚
縞練之不滓。凌丹丘之瓊英。映顙月以騰輝。弄清颺而
彌潔。鷗鷺避而揜姿。海鶴並而失白。詎凡翮之可倫。洵
太素之凝色。考山海之仙經。參玄符與神契。雉千年而

始白表聖皇之靈異茲產毓於炎方應火德之昌熾維
時君臣協心上下勤毖履滿持盈愈謙愈抑乃稱訓以
謂之曰治所弗及不享其貢厥有來享服食器用吾將
盡其實不飾其文慎其感罔求其應茲方長慮而却顧
安敢夸祉而夸慶哉既而念來庭之眊歎惇柔遠之令
謨矜跋涉之間關慮回轅之迷塗乃研法制之妙乃勅
指南之車授符節兮應勲反日南兮故居是將視羈縻
之大義而亦嚴夷夏之訐謨也當斯之際天庥滋福瑞

應充斥鳳凰和鳴騶虞屢出盈塞天淵榮施赫奕然而
穆清之上密勿之內猶且持兢兢切翼翼颺飏風勵無
逸敦共儉明信義厚黎元垂邦計四方無虞大猷允升
於慝於淑以別以旌申畫圻甸慎固提封都哉皇王適
觀綦隆於是歌卷阿兮與天保樂既醉兮暨鳧鷖歛福
疇於皇極錫臣民而共之鞏定命於邾鄆繇赤烏之鴻
圖敕怠荒之傲戒永儼燬於唐虞

擬越裳獻雉賦

明
劉虞夔

猗自皇風遘堯帝治登閭荷天衢兮邕洽禔地釐兮昭
明連四海以清夷輦覆盂之謐運六氣而旁魄諧調露
之聲以故釀化澤淳醇庥屯平邇陋戴天而忘力荒憬
捧日而傾情大角銷氛旄頭寢兵鑿齒反踵之君窮髮
貫胸之萌罔不交臂奉貢屈膝效誠抱嘉瑞以輸款執
奇珍以受成皇皇哉億禩之藻鑠而百王之燁程也粵
周德之邳隆謚王道其灼普王兢兢而睿詰宣相凡几
而公忠睹禮飾治兮其君萬齡樂象功兮其臣千古學

緝熙兮纘文世永清兮紹武物則蕩蕩由於夷庚人軌
雖雖躋於春圃滂其時也紹天闡繹之烈既赫戲兮大
明諦其世也含哺鼓腹之吐羌沕噩兮如煦誠兩美之
必合亶九穹之篤輔紛和氣其滴沔而忻通快愜風其
曼羨而亡還天賜嘉貺兮煥素質於睚矐之靈禽帝介
祉徵兮局閔仁於海嶠之僻土逖彼越裳之國過居林
邑之邊文身裸跣人斯集裳之制散髮蓬鬆家無戴冠
之傳蓋徼外蹇荒雖洪圖閔隔其不圉然日中豐照詭

德寓均帡而廣延乃能翕純光於太始裒瀨氣於重玄
產殊禎兮白雉出地際盛世兮赤龍翔天稟雪姿其融
耀兮朏繁義而蹀躞賦玉彩其炳熿兮舞健翎而蹁躑
苞熊宗之精兮皓尾揭驕而踳踳象離明之德兮翹鳴
吁喔而輕妍如儀庭之九苞兮獨函光而樸古較搏霄
之六翮兮翻斂彩而凝然豈陳寶見竒為二童之所化
實虞華誕協應一德而來宣衷曰天啟謀惟人悲羗物
瑞之告呈繫葵心其肇企乘陽鼉兮古風睇赤縣兮懷

義觀瀚渤其且決滄兮既息濤而弗颶駕餘艘乃以連
卷兮祇抱雉以為贄時王所兮暉暉映瑤階而矚矚於
斯時也君端委而秉珪相調元而襄治宗伯典儀職方
辨位敵庭實之修夸兮展素羽以當階望宸顏其款忠
兮瞻紫闥而受事實諸臺沼鹿濯濯以攸同葵在藪郊
麟振振其作比右平左城傍之以敷輝繡栢丹楹對之
而滋麗續紛兮聳角陸離兮斂翹依帝所以啄餐豈驍
媒之儼視矧其時瑞重九譯琛共八荒玉帛聯翩孚於

冰天桂海之域梯航繹絡齊乎日出月支之方信神符
之天剖兮則遐均之上化故仙禽之地徵兮闡懿鑠於
殊疆格心惟相懋德惟王念窮陬絕徼恐鴻澤之未被
兮乃誇祥詡媿匪懿治之所遑將邵贄而不享允錫車
使歸翔灼哉帝化如環之來兮跨舜聖而滋煜冲哉皇
心為契之邵兮纘武考以彌昌粵宛馬海青季歷徒煩
於使索彼元龜象齒清時亦俯於戈勦疇純粹其張麻
風兮夏翟當萬里而應瑞倬清和其茂洪烈兮海濱曠

千世而開祥懋隆懿之既邈中徽禎之鮮彰羣翼或隨
乎蕭氏素精或見於永康胡德靈以堪稱祗詡舌之徒
張噫嘻社鳴聖生河清帝兆騰蛇遊霧而行應龍乘雲
而矯蓋祥不虛呈瑞為時表稽古甘露醴泉器車龍馬
之經綸朱英厯草連理同莖之遑皦允維象德而顯形
詎曰無因而紛沓諗沐義以浸仁斯瑞葱而禎懷方今
大明膺圖萬厯始肇敷文解庖義之繩偃武寢周宣之
旒八蠻棄矢穹廬銷鳴鏑之獷雄萬寓安瀾炎海應伏

波而殲剿騶牙啓瑞鯨海成塵踰沙軼漠棧山航海之
環歲無虛月九真黃支翡翠火齊之賁府無停輪丹厖
與卬笮而請吏左賢並谷蠡以稱臣方將貢楛矢於窮
域通昭簪於遐垠亦何誇周風之熙穆徒以搞漢賦之
炳麟

銓衡賦

明
蕭子鵬

維皇嗣統聖治聿弘黃河清兮坤德斯應泰階平兮乾
象有徵載聘元老以車帛敬司冢宰於銓衡寔領提於

百職協寅亮於六卿維銓曰衡總允厥平酌多寡兮隨
量較輕重兮稱情彼四銓十銓之卒度亦曰中曰正之
是憑知人實難任賢則明內罔測兮括隱外罔別兮飾
形羌州里兮未目諗肆天下兮皆耳名嗟歎百官曷歸
於正百姓曷底於寧君心曷格厥非士習曷反厥誠悉
我宰而攸視於王國而是程明斯燭兮惟義其精量斯
宏兮惟仁其勝守斯確兮惟信乃貞決斯果兮惟勇則
咸低昂隨變兮不限物以凝多寡適均兮不於我取盈

孰謂我宰掌量衡而不可并是曰股肱惟人良臣惟聖
企伊尹兮以一德而佐佑慕武公兮著抑詩而箴儆殆
有知厥由邪宅吾心而主靜察精微於極致審舉錯於
一定不先著物於彼偏不後泥物於此競廓大公以無
我付物物於順應允作斯世之保衡大對吾皇之休命
嗟予儒者逢時生靈之慶進一賢俊兮一國作福用一
不肖兮一國是病欣嘉善以獎廉潛剔姦而去佞輯九
有以咸和敷元化而益盛肅鯁生以斂容效贊御而供

令

典禮

郊禋賦

明
葉向高

伊坤維之奠壤兮含萬彙以資生曰崇報其維后兮覲
大享於周京於時景風用事兮柞木火而陰萌猗既協
此靈辰兮皇心肅而匪康咨百司以戒事兮吾將荅明
貺而趨蹌紛總總其靡營兮被心乎無為之鄉相齋宮
之邃竊以絕氛兮躬萬乘以蒞之集芬芳以為佩兮祥

光燦其陸離爰諏卜之式虔兮穆將愉乎靈祇乃命豐
隆使乘車兮屬飛廉以清塵屏祝融之蒸烈兮前望舒
而受成翠華縹緲其流映兮駟道連蜷而若雲排鳳闕
以高游兮升秘駕之鞢鞢駢蒼螭而服玉虬兮流蘇飾
而繽紛雕軫星馳乎周原兮轉黃屋於鉤陳衡牙轆轤
以先集兮萬騎護布而駢闐笙匏嘈嘈而沸路兮若張
樂於洞庭之濱亦有清候之旅周廬之班搖鳴璫而驚
佩兮屬橐弭以扈鑾朱旗閃爍其干霄兮濟濟乎夾裕

輅之危冠是日也天宇廓其沈寥兮雲容容以溫晏睭
端翳之若驅兮光剌剌其有爛爰至止於郊宮兮蒸明
膏以繼旦夜迢迢以欲央兮時朏朏其將燦蒙茸奉引
兮庖犧為御司樂鳴銀兮燎師設炬帝乃佩瓊琚之華
飾兮秉圭璧以修容袞冕端其差我兮含明德以飾躬
羣望秩秩在列兮揖衆祇而攸同薦黜特於方鼎兮藉
菁茅之蔥蔥張鈞樂於廣野兮奏賁鼓之鼗鼗
而為芬兮若木噴其英華匪瓊漿之芬郁兮或餐吸乎

流霞也羣工儼以翔集兮亦助帝之休嘉也禮九獻以
既終兮樂六成而來下紺宇終宵以流素兮祥煙吐而
欲射甘液沾濡於壇壝兮蒼龍蟠蜿而隨駕衆恍惚而
忭舞兮莫萬靈之迓也誰云黍稷其維馨兮乃明德之
所藉也帝逍遙以容與兮猶秉德於中心曰余肆類其
弗莊兮神宵昧以難諶縱垂休其不余棄兮敢信乎百
禮之孔士於是百僚合詞而進兮皇用格於彼蒼既九
筵以納祉兮宜受命之溥將昔虞廷之輯瑞兮類禋徧

乎羣望迨周家之基命兮永將享於牛羊況帝德其信
姱以要眇兮又何疑乎降福之穰穰若彼汾陰黷祀兮
典既箴稱卜郊圖識兮事益匪經此近世之陋習非明
哲之所程惟吾列聖有造兮嚴恭大象湛皇澤以涌澧
兮三靈荅響雖分合之異宜兮諒厥誠之弗爽迨帝愈
攬德以弗皇兮配欽明之蕩蕩彼神雖驚景以難度兮
溘埃風而來往於是旋鸞旌於周途兮肆王軼而回遲
却千里之飛兔兮分謝玄澤之猶夷幹維張兮地軸開龍

淵澄兮馮夷迴岳靈謚兮景風諧寶鼎出兮神馬來溢
八方兮暢四垓億萬世兮樂康哉亂曰莫矣黃靈萬物
母兮悶彼方澤神之宇兮含化淳流配昊蒼兮山盈川
冲而無疆兮有聖者帝崇明祀兮展采揭虔象乃世兮
沐浴福應熙鴻業兮皇皇靈圖赫斯烈兮

郊禋賦

明
邵庶

維皇御極十有二紀湛恩龐洪藝則夷砥憲度著明統
緒順里孕帝道而齊驅陶王猷而軼軌宣二祖之重光

襲列聖之洵美奉定省以統天經儀雍肅以綏靈社庭
充振鷺之侶階漸鸞鴻之臣戢武以征不諛敷仁以懷
兆民展采錯事修禮百神諸夏樂工百蠻獻珍蕩滌災
荒之釅振清榆塞之塵先時執事告於秩宗曰時仲夏
陰氣初逢直方含弘粵在北封用昭舊典報禮其恭常
伯入告炎帝司治舉月之望一陰甫至蕤賓協律萬物
聚萃式展誠懇就乃陰位帝曰俞乎朕其舉哉戒飭羣
司各即其齋司空除太圻之壇金吾視堯陌之塗春官

獻頌禱之文監膳陳彝鼎之需維時天子迴視却聽澄
冲純白淵默雷聲宵旰疏食齋宿弗寧芬德馥郁戒日
妥靈然後金門曙啓玉輅晨馳虎賁後衛龍驤前驅雲
輝翠華之蓋露拂丹旂之旗都人繩繩而拱極多士濟
濟而承曦爾其風伯效悃清厥道兮祝融執衡潛厥燥
兮方澤戾止乃躬禱兮穆穆肅肅格穹昊兮琮玉殷薦
從厥德兮犢幣惟黃純以色兮犧尊疏布朴以質兮桴
酌莞簟素不忒兮郁哉煥乎地符精烈酌以明信達以

芳飮三事栗栗而裸將百執兢兢其陳列窈窕絲竹其
音鏗鏘鼗鼓其節奏空桑之如繹舞咸池而若綴三獻
云闕六變禮成萬祇醉止諸福攸呈玉瘞牲羴龍璇鳳
轉薰風偃草以迎輶紅雲獻岫而隨輦山嶽增輝兮
菁蔥飛動含春兮婉孌凝赤子之歡心啓玄冥之戩善百
祀欽修兮咸秩兩宮長壽兮天隲阜民返始兮上儀丕
業昭垂兮紹述廣清廟之徽頌播講德之芳躅蘊典引
之弘規揚皇仁之優沃亂曰虞始類禋儀制章兮用配

祖考思用光兮汾陰廊時戾厥常兮坤宮介禮黷勿臧
兮聖謨定矩邁前王兮懿典備舉翳我聖兮默導羣靈
達馨香兮多集純嘏迓禎祥兮聖壽千億祚無疆兮

恭和御製謁陵禮成奉聖母舟還京記事述懷賦

明
夏言

維膺命以肇造鴻業兮天寶純佑我太祖維定都以求
保丕基兮天寶篤生我文皇據鍾陵金臺之南北峙兮
儼鬱鬱龍鳳之岡傳一世以至千萬世兮信天命之有

恒興禮必待百年兮非至聖其曷當肆我皇之撫運而
紹統兮動必取法乎三代之明王乃一心對越乎上帝
兮可以質鬼神之在旁念七聖功德之巍巍兮自文祖
以迄武皇抵陵謁以北詣天壽兮脩曠典以振四方之
綱既齋心以積敬兮復考禮以致其詳戒萬乘而翼慈
輿以俱發兮爰諏日得季春之良六師總總以扈蹕兮
歡聲震乎萬邦俎豆之具歆兮感至治之馨香伊皇
天皇祖之眷德兮龍舟送喜兆文孫之祥張廣樂於西

湖之上兮覽玉泉於金山之陽川后奉棹以先驅兮玄
武振旆而啟行拱慈顏之儼若兮俯臨汎容與而悅康
三辰正而百穀熟兮五兵弗試而斂芒觀太平之有象
兮頌我后之明明惟百辟承式之不暇兮顧臣力何有
於贊匡仰稽首而颺言兮願一人建極以聿開萬世有
道之長諄曰於穆聖主裕後光前聖文神武休德克全
二帝鑒茲百神享焉三代哲王道統是傳惟敬惟一惟
日顯顯永言保之億萬斯年

聖駕躬耕帝籍賦

明
莊履豐

帝天挺其聖哲兮躡堯舜之希蹤
敕天命之時幾兮一日二日而不敢康
御寓更七載兮曰寵綏之四方
猗帝業之遐邇兮光天之下比屋而可封
豈成周迺敢望兮迺抑抑而謙
冲本姬籙之攸永兮日亶亶於矇之誦
維民依在稼穡兮獨閔閔乎田功
朕皇祖之肇祀兮載祀典曰先農
肆萬邦之嘉靖兮書無逸而寫豳
風率首隆於茲道兮以率育而勸功
茲星鳥之中律兮其有事於

先農之宮敦宗伯使視草今循行屬之司空開阡陌之
畇畇築壇墀之崇崇道原路之砥砥修別殿之重重維
辨方以正位今蓋就於國之東太史為吾以占吉今歷
吉日吾將從太史先奏天子將出居齋宮告太室曰敬
以元日祈穀於上帝躬畊帝籍於是夙戒駟御特嚴警
蹕乘鸞路兮載青旂戴朱紘兮服蒼璧千官肅震兮若
衆星之拱北辰萬騎屈橋兮若羣類之競朝日屬車負
播殖之器後宮獻種稔之實方發軔於天津遂弭駕於

疆場穆穆皇皇蹲蹲肅肅配以少皞祀以先嗇禮以三
獻樂以八佾隱鐘鼓之砰磕兮越球鳴而戛擊酌鉅鬯
之泔澹兮薺棍枇而吹拊神莫莫其來茲兮歆薦享乎
帝澤雖發生其有在兮實播種之於是日是日也天地
煦嫗草木勾萌近甸堪樂條風載揚農經叶兮授事農
正指兮告祥司徒進兮黛耜京尹手兮青箱紅鞮懸兮
葱韃紺轅駕兮蒼龍天子始下靈壇移染屨冕而躬秉
耒以畊三推則土膏脈起四顧則溝塍砥平迨爾公爾

侯之迭進迺或五或九之嗣興庶人走千畝終仰藉帝
力遂及我疆蓋千耦以之孔皆一人於焉有喜下念此
昏作兮每身先而悅使上將致美乎粢盛兮羌盡力於
耘耔匪鈞盾之弄田徒夸矜兮兒戲準直既飭人神告
休執爵太寢式宴以酬靡薜荔以為席拆瓊枝以為羞
有酒如澠有肴如丘蓋三公九卿諸侯大夫皆御命曰
勞酒下逮庶人台背黃耆亦與宴勞為天子壽萬樂齊
百禮暨皇歡洽羣臣醉撞鐘告罷庶僚遂退五輅迴鑾

九旗還旆於斯時也居靡都鄙民無華裔側肩躡踵而
交集振裾倚裳而咸戾既以聳觀乎天顏莫不謳歌乎
聖世歌曰倬彼東郊理有疆兮大君至止敬斯皇兮必
躬必親供神倉兮神之聽之登穰穰兮以嘏曾孫受天
之明兮又歌曰倬彼東郊壇其崇兮大君至止敬斯隆
兮必躬必親率我農迺不忒樂歲豐兮以祝天子
萬福攸同兮

經筵賦

明
范謙

惟明十葉嗣武聖孫膺寶歷而受圖建皇極以宅尊允
克綏於鴻烈宣作配於上京於時皇穹既格靈祇載禮
九廟肇禋百神綏祀帝籍告登辟雍蒞只爰冲默以凝
神時臨朝而思理允惟六籍之淵泓實皇王之遺軌欲
鏡往以圖今宜澄源以清委乃召師臣乃命禮官檢熙
朝之故事疏儀制於經筵伊文華之列殿實密邇乎金
鑾矧列聖之所臨障芳猷其在前爰諏咨於穀旦紹盛
美以從先乃涓仲春曰維二日月凡三御朕罔自逸涼

煥攸居貞常靡武眷我師儒惟其承式於是先期司宮
布茵門尹除門戒儀鸞以供帳肅衛士以嚴扃珠網錯
落而交布兮果曄綺疏繇密以糾結兮雕樨蕙蘭荃與
椒桂兮藹葱蒨而蟠氤氲儼中央其端麗翊黼座於彤
雲其左則丘索連歸皇墳帝典纂繩契之微詮錯盤孟
之琬琰陳龜筮與龍圖肆葩章與麟管溯姚姒以窺夫
洪濛循蒼姬而極於正變其右則天祿珍貯石渠秘史
班馬遺文陳荀志紀燦貞觀之六典迄太平之載記綜

南北而貫華夷彙編年與紀事具袞鉞於幽潛凜鑒觀
於興替煌煌乎煜東壁而耀西崑儼星陳而日麗厥有
博達者儒惇德老成承明舊侍金馬時英夙紬名理更
演前聞諧心口而自誓期披瀝其生平耀鸞膏而待旦
含雞舌以遲明厥惟昧爽宵衣斯起鼙鼓聲希鯨鍾鏗
止進百辟以起居承絲綸而唯唯徐振響於鳴弔乃雍
雍而旅退於是天子却寶座登乘輿太一挾輶勾陳拂
帷轉風雷於雙轂閃日月於龍旂介六丁而前驅兮羅

列宿以後隨度虹梁而歷金水兮屬馳道之逶迤望文
華而屈止兮劃壁門其雙披乃降輦而拾級以登陟兮
洵禹步而湯躋擁虎賁其翊衛於階序兮駐仙仗於軒
墀爾乃黃幄弘張丹宸載陳天威咫尺就日望雲繫其
發德音進儒紳元庸碩輔公孤上卿參以薇垣侍從之
班糾以蘭臺侍從之臣濟濟蹒蹒攝齊乃升胸臆贊拜
稽首平衡爰分曹以列侍儼鵠峙而鸞停於是太史呈
書侍臣拱案展縹帙兮琳琅進牙籤兮璀璨講臣乃侍

立而前參仰重瞳於宵漢始依經以析理遂旁疏以流
貫上下乎古今極天人之浩瀚首帝典以恢盛治之規
模翼諸史庸鑑前王之理亂既卒講而進規猶反覆乎
終篇而三歎冀以聳悟乎宸聰庶幾其弼諧而襄贊時
乃皇心載啟天顏有喜徐端拱而言曰卿言旨哉朕其
繹矣惟我臣工咸思厥理尚交儆以無虞惟永孚於休
美顧我儒臣思亦勞只命大官以行庖詔饗人以酌醴
於是諸臣羣造而前再拜長跪祝聖德兮巍巍念皇心

今疊疊惟典學圖於有終惟令聞期於不已振文治以
輝煌播皇風兮清馭於以軼虞夏而邁殷周追黃唐之
遐軌伊南越與北荒胥漸於聲教而靡靡乃歌既醉於
周京賡虞廷之喜起頌曰於惟皇王誕聖神兮淵涵沕
穆統道真兮時乃緝熙單厥心兮皇自敬德日兢兢兮
期予交修弼厥成兮於昭至治文德馨兮舞干兩階四
夷賓兮於萬斯年樂清寧兮

親蠶賦

晉
王 禎

惟蠶有功萬世歸美廣物產之貨貨作人生之衣被仲
春之月天子詔后以躬桑大昕之朝內宰告期而命祀
於是詣靈壇降寶殿翠障夾乎道周鳳輦翔於畿甸順
春氣於東方朝先蠶於北面具夫青縹之服侑以芳馨
之薦當其疊承寵命適對韶光擇世婦於卜吉受鞠衣
於明堂崇開禁館始入公桑拔條有三聽女尚書之勸
止執筐不再受宮夫人之是將體之以坤儀之柔順視
之以母道之慈良破蟻以來庶養至於千簿獻繭之後

諒化被於多方

宴嘉賓賦

晉王沉

朝陽曜景天氣和平君臣合德禮儀孔明酌羽觴以交
歡兮接恭敬以申誠嘉膳備其八珍兮絲竹獻其妙聲
樂周徧舞金奏克諧鍾儀之聽南風是哀義感君子慨
然永懷思我王度求福不回惟禮終而贊退兮實繫心
乎玉階

後苑燕射賦

宋宋祁

執徐統歲少皞司秋月著授衣之令日紀吹花之游司
射謹官梓人庀具飾虎進侯張狸設步厖崇旌以虹拖
畫廣墀而雲布并夾并儲決拾相旅我物孔陽我儀用
光剡矢薦於夏簾雕弓出於扶桑采五施而列暈歌九
節而升堂萬乘來御羣心樂康弦隨月上弓與天張捨
拔則供應弦而中主皮劃其已徹勁羽飲而猶動駭跋
烏於日域震封狼於星冢皇矜兌說協氣雲蒸少府之
賜錢流地庖人之割肉如陵軒霞蕃后盤石宗英美發

的之希代咸奉觴而造庭射之為義是謂觀禮外則審
固而正躬內則雍容而繹志左屈右之能項發口縱
之異或合宴序賓或算多與祭公用隼而射墉觀如牆
而揚觶中則得為諸侯爭有似乎君子然特人臣之善
容未識我皇之射意若夫修五常為弓矯百度為矢總
黎獻以植的罄跡區而除位參天地之控引順陰陽而
張弛一發則英雄在弦虛撫則蠻夷斷臂豈徒鵠取難
中之名騶樂庶官之備

崇賦有序

明 陳繼儒

禮祭祈雨曰雩止雨曰禳禳賦者讀侍御胡公詩而作也

東南澤國松號水鄉四月維夏風雨其雩葉爛蠶饑泥濕燕忙苔濃蝕壁菌腐生牆操瓢汲井著屐下牀游氛輻輳積霭披猖甫遇涉波之躋豕又謠舞市之商羊始散之以霰霏_繼繼之以汪洋噉城城圯摧岸岸僵二麥垂穎百室冀嘗洗口枵腹涕泗徬徨恨補天之無策痛

納隍之可傷恭逢侍御奉命東方皁囊白簡錦衣繡裳
軫下民之其咨走羣望以裸將清獄訟恤流亡治溝洫
築堤防飯草蔬絕酒漿先有司叩穹蒼擊鼓蓬蓬考鐘
鎗鎗祝詞則滿腔血淚詩句則明德馨香神乃掣火鈴
耀八荒墨雲捲玄霧翔朱電匿白虹驤震雷不鼓巽風
不颺義和馭日麗於扶桑熒熒杲杲蒼蒼涼涼萬物昭
蘇兩儀重光鶯調竹塢龜戲蓮房鳩晴喚婦蜂煖從王
婦子嬉嬉為樂未央挂芒屨於古木曝蓑笠於垂楊乃

牟乃麥乃積乃倉借葵藿之餘照回藜莧之枯腸懇疆
笑土播穀分秧渠鄭白以偕灌耦沮溺而非狂俄織如
雲之綠俄鋪萬寶之黃實江南之庾廩助淮北之漕綱
誰驅大潦錫之小康誰拔泥塗置之周行幽明非遠精
意孔彰駸駸雲龍霜威逼而遠遜行行驄馬雨師避而
潛藏真手挽天河之伎倆亦胸羅星斗之文章執彼兕
觥登我公堂何以壽之崑崙一觴何以報之雲錦七襄
侍御逡巡謙讓未遑曰羣陰之掃蕩由我后之當陽靡

神勿聽靡災勿祥雖告焉而如響當知帝力之難忘

逸句 附

皇子冠禮賦

宋晏殊

玉英珠薏之元貺日角山庭之峻格漢幄增輝堯門有
赫亨期俯協冠禮斯陳曄華纓而粲粲峨爵弁以斌斌
啟嘉會於中闈動歡聲於紫宸正容體兮道昭備服順
辭令兮誼協成人義易考祥契黃離之元吉漢詩載美
歌皓月之重輪觀吏牘以知遠朝寢門而竭忱

親蠶賦

晉 閔 鴻

后課功以觀匿均衆寡而抽稅令織紵於命婦供禘郊
之舊制洪恩美而周普配春天之景福揚黼黻之奇藻
播朱紫之豔色

禎祥

萬壽無疆賦

明 張 鼎

皇帝執素象履黃中攬皇極廓帝紘春臺華胥六合同
風於今三十有七年登閼陟乎伊耆兮闡化齊乎義軒

遐圻風衍而需雲兮過甸沫膏而浴淵沕乎其不識不
知者歌孔固而樂萬年也月維仲秋浹旬八辰玉露零
兮穹碧金飈扇兮商清卿雲爛兮天宇淨重輪朗兮八
表澄泰階兮暉旦蓂莢兮長春天得秋兮樂歲登聖得
秋兮應乾靈爰紀玄鳥之奇稽華渚之徵曰維是辰誕
我聖人也於時玉階風清彤庭景麗殿龍幄列鳳蓋樹
綵旂建雲旆辰曦迎乎玉鑾上駟佇乎金駕天官從乎
綬儀執爰介乎瑤珮遲青蹕之函風望皇旒而瞻鞞

皇上乃麗左介坐玉填服山龍冠通天受貞符於上穹
奉丁辰而御景年於時我冠山峙垂紳鵠立貂蟬句臚
鵠鷄就列環琚聲徹於丹墀纓綈色映乎綺疏頌高墉
而稽首稱嶽算以三呼乃有維城磐石肺腑帶礪纁玄
乘黃充庭迺邇貢物惟方酌觥以次又如畿甸疆圉之
翰之屏星馳轂湊大鍾南金惟不耗乎民力乃以媚茲
一人又如占風候潮之屬日戶月窟之侶開梧浮竹之
苗左子前兒之裔闔庭溢闕襁負責贄於焉麗象胥而

紀王會非勤遠而誨貪兮亦以紀夫山珍與海瑞其他
般般之獸雖雖之禽馴馴其舞噦噦其音萬象孔閑效
茲百靈至於甘露瀼瀼瑞禾芄芃仙芝在圃屈軼在庭
紛紛奕奕不可殫論固壽域之薈聚兮章天符而驗帝
文於是會朝既盈萬舞畢設皇歡既於燕滑蘭卮薦乎
時哲寶侑陳兮席敞華鍾鏗兮觴洽冠蹠忻忻而沾醉
氓隸鼓舞而大餽藩牧雀躍而醇酣雕題蹒跚而腹飲
共食於仁壽之大德兮又奚啻夫山為籌而海為杓也

於是羣公三事舉觴進於庭曰休哉乎聖天子之遐祉也臣聞乾健不息而歲成聖人自強而光明道之久者保其精而耆其神壽之極者大其施而和其民故夫襲百祿而躋萬壽者皆無欲而清安靜而寧者也且夫元氣滲漉句萌畢蘇毫為暖風澤為甘露此亦聖人之蓬壺也河魁合張天鏡在握神機掣電威靈赫濯此亦聖人之海籌也包荒納汙屏喜去怒有喬松養性之度焉居高節嗇不淫不溢有崆峒長生之則焉惟穆惟貞無

色無聲有廣成治氣之經焉用能使玉符永而金嶽應
七曜貞而三光正蓋一日二日者兢業而千年萬年者
康寧歟於時天子瞿然戒滿穆然思盛竦呼祝之言恧
盈慶之論增美玉衡惕持金鏡曠乎恢止輦之度廓乎
下蠲逋之仁延敦誨之耆親不二之臣修煖閣之故事
渙象闕之綸音解霜飛之纍繫還剝膚之涓人出朽蠹
而贍九域別簧鼓而定一尊恢恢舜日蕩蕩堯春上光
施乎往牒下靈蔭乎後昆於以歌我明聖人之壽千古

夏絕者繇繇乎未有極也又奚侈乎岡陵之祝華封之
頌也哉頌曰隆隆壽國暉帝極兮一人孔固萬民懌兮
穆穆緝熙貞不息兮窅兮淵兮儼精一兮神之聽之降
厥福兮子子孫孫長樂康兮

河清賦

明
楊士奇

歲在旃蒙月維攝提其日癸卯晨光初晞祥飈融暢慶
雲爛垂天子御丹宸闢彤闈班龍節建鸞旗肅九重之
容衛紛百辟其來趨促武乎金門屏息乎彤墀乃有陪

臣晉國之使頓伏殿陛陳詞獻匭上言河清河津之渙
發書訊占聖王之瑞臣實睹之敢告天子天子曰嘻天
道應人必以類至作德者降祥弗德者垂戒予未究乎
慎修其何以與於是也使者既出時則徹侯上公羣卿
列秩仰聆玉音愉愉忼忼固已識其靈祥未備究乎事
實退就使者而悉焉使者曰昉河流之將清蓋先時而
異狀其始也沉碧凝黛流丹曳虹忽易復殊艱色彌望
炯素華之皓潔汎玄晶而潏沆妙神化而屢殊協五行

之遽旺方其渺渺瀏瀏混混瀼瀼湛如清渭之奔浩乎
蒙泉之放涵荆玉而演迤拖齊穀而浮漾影萬象於昭
晰而淨纖塵之決瀆也於是傳告雜遝聽聞駭惑奔走
道路聚翫厓側睛目炫奪心懷暢悅鑑妍者賞明濯汙
者避褻此其大畧也其詳未易以遽說焉於是聞者俯
而思顧而言曰河之發源出乎崑崙淤澱炭漫混混渾
渾濁涇方之而尚冽潢潦擬之而同昏然而其清為聖
君之瑞見於子年拾遺之記兆天下之平出乎京房傳

易之論洪惟我皇繼序太祖道合義軒功隆舜禹政教
施乎萬邦德澤流於九土斯河清之協應豈偶然之故
也蓋水之為用滋潤長育六府所敘功同土穀造化於
是而發祥非在惠養斯民而致其豐足者乎革去濁汙
瑩然湛明非在蕩除貪穢而用夫廉清者乎斯盛治之
所本豈尋常之為異雖聖德之勿居諒天意其有在固
將表治化之熙明而徵太平於聖世也躬逢盛事振古
所希拜手陳賦繼以歌詩詩曰水生五行兮天一攸生

維河之祥兮革汙為漱千歲一見兮協我聖明澤流潔
清兮隆化斯徵於千萬年兮邦家之慶

河清賦

有序

明 應履平

臣聞黃河之水一千年一清清則必有聖人出焉迺永
樂甲申冬十有二月吉旦其蒲洲之地河澄清凡若干
里越明年乙酉春正月中泮乃止有司以其事來聞由
是臣庶歡慶薄海內外罔不稱戴而更相謂曰聖人在
位運開太平而暘時若海嶽效靈其適當今日乎臣也

生逢明時目覩盛事抑何幸歟遂忘芻蕘之賤敢竭螻
蟻之誠爰乃輯辭以獻謹稽首頓首而為之賦曰

帝將永樂以為紀兮闡文運乎大猷越龍集乙酉之歲
兮貞攝提於孟陬帝御奉天之殿兮服袞龍之裘登九
五之大寶兮垂十二之冕旒龍墀前陳以鹵簿虎士旁
列乎兜鍪劍佩鏘鏘獻納嘉猷衣冠濟濟對揚皇休俄
而有司之來朝兮遠自蒲洲拜首稽首兮敷奏如流曰
乃黃河之水也亘古今而不息矧水之為物也妙造化

而莫測運動與天地同機流行與聖人同德其來也有
所自其往也無所逆是宜其通銀漢出崑崙環砥柱歸
海門世非明皇之出兮歷千載混濁而狂奔當今聖人
之在位兮渺萬里澄清而不渾羌湫冽以浩漈兮淨乎
如素縑濛濛以彌淪兮蔚乎其藍靛瞰蒼蚪之深蟠兮
勢蜿蜒而形見觀黃鵠之高度兮影顛倒而目眩碧湛
星河昭回雲漢上下徘徊風行水渙皎碧玉之一片兮
涵太虛乎清玄瀦黃金之萬斛兮浴明月乎嬋娟樂禽

鳥之翱翔於其上兮無乃鳶飛戾天快鯤鯨之變化於
其間兮得非魚躍於淵夫何晝夜之不停兮臣興宣聖
川上之歎容光之必照兮臣感鄒軻觀濶之篇使攬轡
者聞之而志慷慨擊楫者見之其氣飄然孺子不敢以
濯足太公由是而投竿豈無獻頌之鮑照亦有乘槎之
張騫逮夫日月之照耀兮漾玻璃而流鉛睹樓閣之崢
嶸兮烜金銀之新鮮是蓋不知其為河伯之宅歟抑亦
不知其為馮夷之宮焉但見其開貝闕啟鱗軒繪文魚

烹白黿珊瑚鉤兮蝦鬚半捲羅羣仙兮珠履踟躕行蒲
菊潑綠之酒坐玳瑁編欄之筵既而出龍尾金星之硯
書鳳花錦雲之箋染墨如漆操筆如椽吐成珠玉迅掃
風煙云以美皇圖之廣兮西流沙而東於汗祝聖壽之
長兮同河清於萬萬年將見龍馬負圖兮必不專美於
前況復神龜兆瑞兮耀簡冊乎後先臣撫斯言以進覽
兮竟忘冒瀆之愆臣何幸身親見之矣不自知其詞之
陋而言之煩維時慶雲散彩麗日騰空上達清聽喜動

重瞳樂韶舞兮奏中和於郊廟播聲詩兮歌大雅於辟
雍百獸兮率舞六合兮同風於是羣臣再拜而言曰蓋
黃河之所以清而清者實由帝德之所致以兆太平之
象也若可以無事乎九重垂衣裳而治也帝曰噫嘻非
此之謂也卿知其一未知其二在昔太祖風虎雲龍承
天受命峻德成功垂四十年於變時雍陟降在上昭茲
聖容則凡今日玉燭之所以調和金湯之所以寧謐海
岡之所以效靈禎祥之所以疊出一皆太祖在天之靈

於朕何力之有哉尚烏可安於自逸而忘所自邪抑可不勵精圖治而思所以加之意也於是羣臣莫不以手加額曰大哉皇上之言乎一哉皇上之心乎臣等無乃以管窺天以蠡測海歟遂終之以歌曰河清河清兮龍德正中君明臣良兮千載一逢高岡巒巒兮鳴鳳朝陽
峩峩兮梧桐河清河清兮陽德正中

御定歷代賦彙補遺卷七